

梁天來（唐健垣唱）

【南音短板面】

【正線慢板】睇大戲，論悲哀。又話苦唔過金葉菊與及個苦命嘅梁天來。◦
梁氏嘅慘情，發生在清代，因為同鄉爭風水，攞到好悲哀。
嗰個惡人叫做凌貴興，與及一個凌宗孔，就將天來害，七屍八命剩咗個梁天來。◦
話說廣東某縣，有一位凌爺要將風水改，又要謀人古物，實在太不該。
嗰陣天來佢婉拒，係一而再，但係個惡人，佢恃住大把家財。◦
帶住一班家丁，嚟到發惡，亦都一而再，嗰陣天來家眷，走入一間石室去避災。
點知個凌貴興，叫人放火，將啲烟攻入窗門內，佢話烟燻人肉，問你出抑或唔出來。◦
唉可憐老弱就暈在室內，石室被封門係打唔開。
慘咯七屍八命，真係天理唔在，一門死剩梁母與及天來。◦
因為天來剛巧經商在外，回來驚聞惡耗，就把喪開。
唉啲鄉里怕嗰個惡人，都唔敢睬，凌貴興帶惡僕，重搗亂靈堂。◦
唉真係無天理，天眼唔開。衙門唔講理，只係講錢財。◦
天來幾次將狀告，唉可憐棒杖無情，打到佢肉爛皮開。
嗰個黑暗嘅縣衙，話佢將人誣告，咁佢就告完縣府，又告道台。◦
個凌貴興，佢話天來，我唔驚你告，你除非上京告御狀，
我怕你就係衰仔(音代上平聲)。

【中板】咁樣天來無奈就離家往，經過南雄關口住下來。◦
在客店驚魂難入夢，因為凌府家人，要阻佢離開。
在關口搜查係如狼虎，要把佢害，假若捉到天來，就要將佢送泉台。◦
天來在客店難入寐，等到天光要出關，又怕避唔開。
想後思前惟悲嘆，正係冤深如海，你話誰似天來。◦

...

...